



## O 19 de febreiro

de 1977 saía do prelo o número 1 de *Encrucillada*. Neste febreiro de 2002 damos á luz o 126, vintecinco anos despois. As vodas de prata da nosa revista coa fe e a galegitude merecen unha celebración, e farémolo da maneira que sabemos; por iso os lectores encontrarán este número máis grosso do habitual e cunha faciana renovada. Acharán un índice dos últimos cinco anos, que complementa os aparecidos no número 100, algunha sección nova e uns contidos de claro teor celebrativo. Na páxina 8 encontrará o lector o anuncio do **acto de presentación deste número especial**, ao que fica convidado. Neste acto entregaranse tamén os premios *Encrucillada*, convocados con motivo do 25 aniversario.

Para abrir o número, tres estudos esculcan os últimos vintecinco anos de Galicia e da Igrexa galega e analizan os que consideran feitos relevantes dos seus respectivos aconteceres.

Vense repetindo con insistencia que esta etapa da Igrexa, que inaugura o terceiro milenio, é a xeira dos laicos. Outra cousa é analizar as posibilidades en que esta participación laical se poida producir. E son moitos os laicos e laicas que gustarían de poder exercer papeis máis activos nas súas parroquias pero tamén moi frecuentes as ocasións en que non encontran as condicións para o faceren; son seguramente moitos máis os cristiáns que se desvinculan da Igrexa, e constitúen multitude os mozos e mozas que nin sequera chegan a conectar algunha vez. **Bernardo García Cendán**, que no número que abría o milenio analizaba a vitalidade das nosas parroquias e os desafíos que deberían afrontar na súa acción pastoral, escolle agora o reto da integración do laicado como punto de mira. Examina os problemas organizativos da Igrexa, analiza as formas de facer dalgunhas parroquias e albisca algúns signos de esperanza.

**Xosé Ramón Barreiro Fernández** deita a súa ollada analítica sobre os últimos vintecinco anos de Galicia. No seu traballo describe a incidencia social do feito autonómico na configuración dun poder galego e na normalización cultural, constatando tamén en ambos aspectos, os abusos do inmovilismo político. Son estudiasas así mesmo as transformacións sociais que os devanditos cambios trouxeron e as súas consecuencias na configuración socio-cultural do país.



Entre a inercia e o cambio. Así ve **Xosé Luís Barreiro Rivas** o panorama sociopolítico galego despois de vinte e cinco anos de democracia. Na súa crónica –como el escolle denominala– pasa revista ás mudanzas, profundas, que sufriu a sociedade galega neste cuarto de século; tan profundas que parece mesmo que vivísemos, en palabras súas, noutra país. Pero se medimos estas transformacións en termos de progreso, tomando como referencia o resto do Estado, parece que as conclusións non poden ser tan favorables. Sería esperable que unha sociedade consciente desta situación arbitrase cambios políticos que permitisen superala, pero lonxe de isto ocorrer, a sociedade galega consagrou nos últimos tempos unha estrutura política de partido dominante. O autor analiza as causas deste contexto sociopolítico inmovilista.

Completa esta crónica de vinte e cinco anos o catálogo da produción teolóxica-espiritual desta etapa en Galicia, da autoría de **Victorino Pérez Prieto**.

Baixo a rúbrica *Vinte e cinco anos de Enrucillada* permitímonos unha ollada cara a dentro. **Agustín Díaz** entrevista a **Engracia Vidal**, que estivo á fronte da secretaría da revista durante todo este tempo e é, sen dúbida, a persoa que mellor coñece as interioridades da nosa publicación. A xeito de conmemoración máis íntima, dous subscritores singulares deixan a súa pegada na revista que os acompañou por longo tempo. **María do Cebreiro Rábade Villar**, poeta, que foi feita subscritora cando aínda se formaba no seo materno, contribúe cun poema. **Alberte Brenlla**, que se subscribiu con 15 anos, conta o seu camiñar ó lado da revista. Tamén, e non por concesión á nostalgia, esperezadas polo número encontrará o lector algunhas das cancións que nos primeiros anos da revista, anos de ilusión, servían de cantos de esperanza para seguir crendo nun mundo mellor.

Hai dous números, xa decididos a unha certa renovación, iniciamos a nova sección *Xanela aberta*. Neste comeza o seu andar a *Xanela bíblica*, por onde se irán asomando distintos libros da Biblia. Unha renovación teolóxica fica necesariamente debedora dunha axeitada lectura dos textos bíblicos. A isto pretenden contribuír presentacións accesibles como a do Libro de Rut, que nos ofrece **Carmen Soto**. Tamén queremos relanzar a sección *Experiencias* á que neste número contribúe **Xoaquín Campo**.

**Xaime M. González Ortega**

*xortega@edu.xunta.es*